

大乘阿毗達磨雜集論述記卷第二十八

唐京兆大慈恩寺沙門窺基撰

復次無諍者謂依止靜慮於防護他所應起煩惱住  
具足中若定若慧及彼相應諸心心法所以者何住  
無諍者若欲往詣一切有情所應見處先於自所住  
處以願智力觀彼有情爲於我身當來煩惱現前行  
不如是觀已若知於我所當起愛恚慳嫉等煩惱卽  
便不往若不當起乃往其所以能護他諸煩惱諍令  
不當起故名無諍願智者謂依止靜慮於爲了所知  
願具足中若定若慧餘如前說所以者何由得願智

者為欲了知所有三世等所應知事。先於彼彼事發  
 正願心願我如實了知如是如是。次入增上靜慮。從  
 彼起已所願成滿。謂能了知所應知故。無礙解者。謂  
 四無礙解。一法無礙解。二義無礙解。三訓辭無礙解。  
 四辯才無礙解。法無礙解者。謂依止靜慮於一切法  
 名差別無礙。具足中若定若慧餘如前說。名差別者。  
 謂依無明等於無智無見不現觀等差別名中無礙。  
 具足若定若慧。乃至廣說。名法無礙解。義無礙解者。  
 謂於諸相及意趣無礙。具足中若定若慧餘如前說。  
 相者。謂諸法自相共相。意趣者。謂別義等。若於此中

通達無礙。具足。名義無礙解。訓辭無礙解者。謂於諸  
 方言音及訓釋諸法言辭無礙。具足中若定若慧餘  
 如前說。諸方言音者。謂無量國邑各隨自想所起種  
 種言音差別。訓釋諸法言辭者。謂可破壞故名世間。  
 可變壞故名色。如是等。若於是中通達無礙。名訓辭  
 無礙解。辯才無礙解者。謂於諸法差別無礙。具足中  
 若定若慧餘如前說。諸法差別者。謂實有假有世俗  
 有勝義有如是等。若於此中通達無礙。名辯才無礙  
 解。神通者。謂六神通。一神境通。二天眼通。三心差別  
 通。四宿住隨念通。五死生通。六漏盡通。神境通者。謂

依止靜慮於種種神變威德具足中若定若慧及彼相應諸心心法種種神變威德具足者謂變一為多等種種神變自在具足天耳通者謂依止靜慮於隨聞種種音聲威德具足中若定若慧餘如前說種種聲者謂人天等聲心差別通者謂依止靜慮於入他有情心行差別威德具足中若定若慧餘如前說入他有情心行差別者謂如實知有貪等心行差別宿住隨念通者謂依止靜慮於隨念前際所行威德具足中若定若慧餘如前說隨念前際所行者謂隨念過去生名字種族等展轉差別事死生通者謂依止

靜慮於觀有情死生差別威德具足中若定若慧餘如前說觀諸有情死生差別者謂以天眼觀諸有情死時生時好色惡色當往善趣當往惡趣後際差別漏盡通者謂依止靜慮於漏盡智威德具足中若定若慧及彼相應諸心心法漏盡智者謂由此智通達一切漏盡方便及諸漏盡威德具足者此智成滿故相隨好者謂依止靜慮於相隨好莊嚴所依示現具足中若定若慧及彼相應諸心心法并彼所起異熟果所以者何諸佛世尊由定慧增上力為欲化度諸有情故示現三十二大丈夫相及八十種隨好相莊

嚴色身。然佛世尊非彼自體以法身所顯故。若諸菩薩能如是示現者。當知定慧為其自性。若所餘於大集會中生者。用彼所起異熟果為自性。清淨者。謂四清淨。一依止清淨。二境界清淨。三心清淨。四智清淨。如是四種一切相清淨。唯佛世尊及已得大神通菩薩摩訶薩所得。依止清淨者。謂依止靜慮於隨所欲依止。取住捨具足中。若定若慧及彼相應諸心心法。取住捨具足者。謂隨所欲生。即便能取。既生彼已隨其所欲壽行分量。即能畱住。若欲捨諸壽行。即便能捨。如其次第三種具足。境界清淨者。謂於隨所欲境

界變化智具足中。若定若慧乃至廣說。變化智具足者。謂先無今有色等名。化轉先已生色等令成金銀等名。變悟一切種境相差別名智。如其次第三種具足。心清淨者。謂於如所欲三摩地門自在具足中。若定若慧餘如前說。由隨所欲刹那刹那能入無量三摩地差別。故智清淨者。謂依止靜慮於隨所欲陀羅尼門任持具足中。若定若慧餘如前說。陀羅尼門任持具足者。謂於四十二字中。隨思惟一字以此為先。便能證得一切法差別名言善巧。力者。謂如來十力。一處非處智力。二自業智力。三靜慮解脫三摩地三

摩鉢底智力。四根上下智力。五種種勝解智力。六種種界智力。七徧趣行智力。八宿住隨念智力。九死生智力。十漏盡智力。處非處智力者。謂依止靜慮於一切種處非處智具足中。若定若慧及彼相應諸心法。一切種處非處智具足者。謂於一切種因非因智無著無礙現行中。所有三摩地等。自業智力者。謂於一切種自業智具足中。若定若慧餘如前說。以於一切種自業智無著無礙現行中。所有三摩地等。如是餘力隨其所應當正建立。云何隨其所應靜慮解脫三摩地。三摩鉢底智力者。謂於一切種靜慮解脫等

持等至智具足中。若定若慧餘如前說。由於一切種靜慮解脫等持等至智無著無礙現行中。所有三摩地等為體。故如是根上下智力者。謂於一切種根上下智無著無礙現行中。所有三摩地等。種種勝解智力者。謂於一切種差別勝解智無著無礙現行中。所有三摩地等。種種界智力者。謂於一切種差別界智無著無礙現行中。所有三摩地等。徧趣行智力者。謂於一切種徧趣行智無著無礙現行中。所有三摩地等。宿住隨念智力者。謂於一切種宿住隨念智無著無礙現行中。所有三摩地等。死生智力者。謂於一切

種死生智無著無礙現行中所有三摩地等。漏盡智  
 力者謂於一切種漏盡智無著無礙現行中所有三  
 摩地等。無畏者謂四無畏。一正等覺無畏。二漏盡無  
 畏。三障法無畏。四出苦道無畏。正等覺無畏者謂依  
 止靜慮由自利門於一切種所知境界正等覺自稱  
 德號建立具足中若定若慧及彼相應諸心心法。如  
 經言我是正等覺者設有世間沙門婆羅門若天魔  
 梵依法立難或令憶念言於是法非正等覺我於是  
 事正見無緣以於此事正見無由故得安隱住無怖  
 無畏自稱我處大憊尊位於大眾中正師子吼轉大

梵輪一切世間沙門婆羅門若天魔梵所不能轉漏  
 盡無畏者謂依止靜慮由自利門於一切種漏盡自  
 稱德號建立具足中若定若慧餘如前說如經言我  
 諸漏永盡如是等廣說如前障法無畏者謂依止靜  
 慮由利他門於一切種說障礙法自稱德號建立具  
 足中若定若慧餘如前說如經言又我為諸弟子說  
 障礙法染必為障乃至廣說出苦道無畏者謂依止  
 靜慮由利他門於一切種說出離道法自稱德號建  
 立具足中若定若慧餘如前說如經言又我為諸弟  
 子說出離道諸聖修習決定出離決定通達設有世

聞沙門婆羅門若天魔梵依法立難或令憶念言修  
此道非正出離不正盡苦及證苦邊我於是事正見  
無緣乃至廣說

解四無畏有三一標列二別解三料簡

如是四無畏略說有二謂自利利他前二是自利由  
智斷差別故後二是利他由遠離所治法修習能治  
法故以正等覺無畏由內智自利門言我於一切種  
所知境界差別邊際皆正等覺於一切世閒前自稱  
德號立正無難具足中所有定慧乃至廣說當知餘  
無畏如應亦爾一切種漏盡者謂諸煩惱并習氣永

盡一切種障礙法者謂一切雜染所對治法一切種  
出離道者謂從方便道乃至究竟道

料簡有二初解二利後解四相

念住者即諸如來三不共念住謂憍大眾時於一切  
種煩惱不現行具足中若定若慧廣說如前何等為  
三念住所謂大師哀愍一切欲求義利起大悲心為  
諸弟子宣說法要告諸比丘汝等當知此能利益此  
能安樂此能利益安樂爾時若有諸弟子眾恭敬聽  
聞聞已諦受住奉教心精進修行法隨法行如來於  
彼不生歡喜心不踊躍但起大捨住念正知隨諸聖

眾所應修習教誠教授是名初不其念住。又復大師  
 哀愍一切欲求義利起大悲心為諸弟子宣說法要  
 乃至此能利益安樂爾時若有諸弟子眾不恭敬聽  
 聞乃至不精進修行法隨法行如來於彼不生恚恨  
 不捨保任心無悵恨但起大捨乃至廣說是名第二  
 不其念住。又復大師哀愍一切欲求義利起大悲心  
 為諸弟子宣說法要乃至此能利益安樂爾時一分  
 弟子恭敬聽聞乃至精進修行法隨法行一分弟子  
 不恭敬聽聞乃至不精進修行法隨法行如來於彼  
 不生歡喜乃至心不悵恨如是三念住顯大師御眾

時隨其次第於一切種愛恚俱煩惱并習氣不現行  
 具足中所有定慧等為體。

念住有三。一標。二牒。三結。捨念正智為體中唯念  
 者。

不護者即三不護謂大師御眾時於隨所欲教授教  
 誠方便具足中若定若慧乃至廣說何等為三。如經  
 言如來身業清淨現行無不清淨現行身業可須覆  
 藏謂勿他知我之所有語業意業現行亦爾。由彼大  
 師心無懼慮善御所化一切大眾隨其所欲自然強  
 力折伏攝受教誠教授方便具足。



不護亦三標釋結。不護即三業。

無忘失法者謂於一切種隨其所作所說明記具足中若定若慧乃至廣說。此中顯示依化事門於隨所作等念具足中所有三摩地等是無忘失法。

無忘失亦念。

永斷習氣者謂一切智者於非一切智所作不現行具足中若定若慧乃至廣說。此中顯示一切智者於所有能表有餘煩惱所知障身語所作不現行具足中所有三摩地等是永斷習氣。

斷習是真如能斷謂正智所起用謂三業。

大悲者謂於緣無閒苦境大悲住具足中若定若慧乃至廣說。此中顯示於緣一切三界有情無閒一切種苦境大悲住具足中所有三摩地等是名大悲。

大悲無瞋無疑為體如五十七。

不共佛法者即十八不共佛法彼復云何謂於不共身語意業清淨具足中於所依及果根未得不退具足中於不共業現行具足中於不共智住具足中若定若慧乃至廣說。

不共法有四。初標廢立。次解名。次別釋。後釋前標。

初文有三。初標。次徵。後明廢立。

何等十八。如經言如來無有誤失。無卒暴音。無忘失。念無不定心。無種種想。無不擇捨。志欲無退。精進無退。念無退定。無退慧。無退解脫。無退。一切身業。智為前導。隨智而轉。一切語業。智為前導。隨智而轉。一切意業。智為前導。隨智而轉。知過去世無著無礙。知未來世無著無礙。知現在世無著無礙。建立彼相。如經廣說。如來無有誤失者。謂阿羅漢。苾芻。雖漏已盡。為乞食故。出遊城邑。或於一時。與惡象。惡馬。惡牛。惡狗等。共為遊止。或於一時。踐躡叢刺。齊足越阨。或於一時。入女人家。不依正理。而作語言。或於林野。捨棄正

道而行邪徑。或與盜賊。猛惡獸等。共為遊止。如是等誤失事。阿羅漢猶有如來。永無無卒暴音者。謂阿羅漢。或於一時。遊行林野。迷失道路。或入空宅。揚聲叫喚。發大暴音。因不染汙習氣。過失輒露。唇齒而現大笑。如是等卒暴音。阿羅漢猶有如來。永無無忘失念者。謂阿羅漢。猶有不染汙久遠所作。久遠所說。忘失憶念。如來永無無不定心者。謂阿羅漢。斂心方定。出即不定。如來於一切位。無不定心。無種種想者。謂阿羅漢。於有餘生死起違逆想。於無餘涅槃起寂靜想。如來於生死涅槃。無差別想。由住第一大捨故。無不

擇捨者謂阿羅漢不以智慧簡擇棄捨有情利益事  
 如來無此等事故無不擇捨又阿羅漢於所知障淨  
 有未得退謂志欲退精進退念退定退慧退解脫退  
 如是六退如來永無又阿羅漢或於一時善身業轉  
 或於一時無記身業轉語業意業亦爾如來三業智  
 為前導故隨智而轉故無有無記智為前導者智所  
 等起故隨智而轉者與智俱行故又阿羅漢必芻於  
 三世所知事不能起心即解故智見有著不能一切  
 悉解故智見有礙如來於三世境暫起心時即徧知  
 一切是故智見無著無礙十八中前六於不共身語

意業清淨具足中所有三摩地等為體無有誤失依  
 身清淨說無卒暴音依語業清淨說無忘失念無不  
 定心無種種想無不擇捨此四依意業清淨說志欲  
 無退乃至解脫無退此六於所依及果根未得不退  
 具足中所有三摩地等為體所依謂志欲果謂解脫  
 根謂精進等一切身語意業智為前導隨智而轉此  
 三於不共業現行具足中所有三摩地等為體知去  
 來今無著無礙此三於不共智住具足中所有三摩  
 地等為體一切種妙智者謂於蘊界處一切種妙智  
 性具足中若定若慧及彼相應諸心心法云何於蘊

界處一切種妙智性具足。謂於蘊等自性差別相通。達一切差別邊際智成滿故。

一切種妙智五十說。能知三事。義非義俱聚。

云何引發如是等功德。

云何引發下第三總釋所作業有二。初所依後作業。初中。初問後答。

答有二。初辨所依後。又如是功德下辨作用自性。

初中有二。初明所依得人。後結成三。此中顯示下是。

謂依止清淨四靜慮。若外道若聲聞若菩薩等。引發

四無量五神通。多分依止邊際。第四靜慮。若聲聞若菩薩若如來等。引發所餘功德。

初中有三。初明內外共法。次明大小乘共法。後明引發所因。

何因引發如是功德。謂依止靜慮。數數思惟。隨所建立法故。此中顯示如是等功德。引發所依止能引發。

補特伽羅能引發方便。云何能引發方便。

後中有三。初標三所顯示。次問引發方便。後明彼相。

謂於隨所建立教法。以眾多作意。定心起數數思惟。

行相。如欲引發無量時。依止靜慮於慈俱心無恨無怨等教法。以修慧相應作意數數思惟。欲引發神通等時。依止靜慮於變一為多等教法。以修慧相應作意數數思惟。如是於一切處數數思惟。如所建立隨相應知。

明彼相中有三。初標次指後例。

又如是等功德。略有二種。一現前發起自所作用。二安住自性。若現前發起自所作用。以出世間後所得世俗智為體。若安住自性。用出世間智為體。又現前發起自所作用者。謂諸聖者。隨其所應發起。斷所治

障等種種作業。安住自性者。謂最勝寂靜無分別智所攝無緣無量等現法樂住。復次無量作何業。謂捨所治障。哀愍住故。能速圓滿福德資糧。成熟有情。心無懈倦。捨所治障者。謂如其次第四無量。能捨瞋害不樂愛恚故。哀愍住者。謂四無量於利益有情。事隨順轉住。由於一切有情哀愍住故。能速圓滿福德資糧。成熟有情。心無懈倦者。由愍諸有情。不顧自身故。解脫作何業。謂引發變化事於淨不淨。變化無有艱難於寂靜解脫。無有滯礙。能住第一寂靜聖住。由勝解思惟故。此中顯初二解脫能引發變化事。由第三

解脫於淨不淨變化無有艱難由四無色解脫於寂  
靜解脫無有滯礙由最後解脫能住第一寂靜聖住。  
由勝解思惟故者顯如是如是勝解義是解脫義勝  
處作何業謂能令前三解脫所緣境界自在而轉由  
勝伏所緣故徧處作何業謂善能成辦解脫所緣徧  
滿流布故無諍作何業謂所發語言聞皆信伏愛護  
他心最爲勝故如其所應發語言故願智作何業謂  
善能記別三世等事。一切世間咸所恭敬由達一切  
眾所歸仰故無礙解作何業謂善說法要悅眾生心  
能絕一切諸所疑網故神通作何業謂以身業語業

記心化導有情令入聖教善知有情一切心行及過  
未已如應教授令求出離。此中顯示神境天耳乃至  
漏盡通如其次第能起身業化導等用由天耳通解  
了一切言音差別能引語業故問相及隨好作何業  
答能令暫見謂大丈夫心生淨信清淨作何業謂由  
此勢力故取生有隨其樂欲或住一劫或復劫餘或  
捨壽行或於諸法自在而轉或於諸定自在而轉或  
復任持諸佛正法。此中顯示由所依清淨隨其所樂  
於所依身取住捨自在卽攝三句謂故取生有等由  
境界清淨於諸法中得自在轉由心清淨於三摩地

得自在轉。由智清淨任持如來無上正法。力作何業。謂為除捨無因惡因論。不作而得論。無倒宣說。增上生道。悟入一切有情心行。正說法器。意樂隨眠境界。資糧當能出離。隨其所應宣說。決定勝道。降伏諸魔。善能記別一切問論。此中顯初二力能說。增上生道。餘八力能說。決定勝道。如是二種具足。顯示諸佛所作。所以者何。世尊由處非處智力。折伏一切世閒無因論者。惡因論者。宣說無倒。增上生道。諸外道等於增上生。或謂無因。或謂自性自在等為因。故名無因。惡因論。由自業智力。折伏一切世閒。不作而得論者。

無倒宣說善趣正道。諸外道等謂不作業自然得異熟。故名不作而得論。由靜慮解脫等持等至智力。悟入一切有情心行。心所修行。故名心行。由根上下智力。悟入一切正說法器。以信等根。若善成熟。能為法器故。由種種勝解智力。悟入一切勝劣意樂。由種種界智力。悟入一切可破隨眠諸煩惱性。由徧趣行智力。悟入一切大小乘教法所攝境界。由宿住隨念智力。悟入一切資糧。前生所集聖道因緣。是名資糧。由死生智力。悟入一切當來功能性。由漏盡智力。悟入一切三界出離。由如是悟入。已隨其所應宣說。解脫。

出世聖道。此十名力者善能降伏諸魔。故善能記別一切問論。故降伏諸魔者。由此十力能降伏蘊魔煩惱魔。天魔死魔為最勝。故雖斷所知障亦不能為礙。故名最勝。記別一切問論者。謂於處非處乃至漏盡一切處所有問論記別無滯礙故。

力中有三。初標此中。下釋後此十名力者。釋力名。無畏作何業。謂處大眾中。自正建立我為大師。摧伏一切邪難外道。大師者。自利利他眾德圓滿。故摧伏邪難外道者。謂能摧伏於如來所說成等正覺。永斷諸漏障道法中邪難外道。故念住作何業。謂能不染

汙攝御大眾。由於恭敬聽聞等無愛恚等諸煩惱。故不護作何業。謂能無閒斷教授教誡所化徒眾。由無藏護自過慮顯彰。故無忘失法。作何業。謂能不捨離一切佛事。所以者何。由此於諸有情現前應利益事。能無放逸不越一刹那。故永斷習氣。作何業。謂離諸煩惱亦不顯現似諸煩惱所作事業。非如阿羅漢。必芻猶現誤失等事。大悲作何業。謂日夜六時徧觀世間誰減誰退誰增誰進如是等種種觀察。不共佛法。作何業。謂由身語意業清淨已得不退。若行若住映蔽一切聲聞獨覺。如此諸句。依前所說於不共三業



清淨具足等相。如應配釋。一切種妙智作何業。謂能  
 絕一切有情一切疑網。令正法眼長時得住。由此有  
 情未成熟者令成熟。已成熟者令解脫。絕疑網者於  
 一切處智無礙。故令正法眼得久住者。於彼彼時方  
 為斷所化有情疑惑。宣說種種法門差別。諸結集者  
 次第結集。令不滅。故依此法眼未成熟有情。令速成  
 熟。已成熟者速令解脫。

其前所說無量解脫勝處。徧處無諍。願智無礙。解  
 神通皆共。二乘有相隨好。已下唯佛獨成。十九功  
 德中無諍第五及願智如顯揚第四六十九俱舍

二十七等解。各并彼鈔解。無礙解如菩薩藏經第  
 十七顯揚第四四十五等解。十地論極解。勘第九  
 地神通廣如前第五。瑜伽第三十五二十七。四十  
 三六十二六十九九十八。顯揚第四第二十。菩薩  
 藏經第十五。十地論第五。法華法師功德品。薩遮  
 尼乾子經相隨好。顯揚第四。瑜伽四十九五十七。  
 大般若經數處第五百。如諸經疏。四清淨顯揚第  
 四。瑜伽四十九七十四等解。十力菩薩藏經第四。  
 佛地第五。顯揚第四。二十。瑜伽第三十九五十七。  
 六十九。智攝四無畏菩薩藏經第五。顯揚第四。瑜

伽四十九五十七六十九及法華疏引華嚴菩薩  
 四無畏念住不護顯揚第四瑜伽四十九無忘失  
 法永斷習氣一切種妙智顯揚四瑜伽四十九五  
 十七六十九七十九大悲菩薩藏經第五顯揚四  
 瑜伽四十九六十九七十九九十一十八不共法  
 菩薩藏經六顯揚四瑜伽七十九五十七六十九  
 等說。

△合辨能證所證第三大段有五初得果捨向二三  
 乘涅槃差別三辨不可記事上來所問應記別故  
 便問不可記四何非初二果是第四果不五辨應

修五種善巧。

復次於諸現觀位證得後後勝品道時捨前所得下  
 劣品道如證得此果所攝道時即捨此向所攝道以  
 不復現前故。

初文有二初明得果捨向非向類故向不捨向是  
 已類故由此菩薩得上地不捨下非果故此亦不  
 然論本但言得勝捨劣釋師指如得果捨向非諸  
 菩薩得勝地不捨前劣地亦非已類故。

又即此時集斷作證由得果時永斷此所治種類煩  
 惱品麤重令無餘故證得勝品轉依故。

第二別牒。又於得果時集斷作證。如說斷五下分結五上分結究竟集處說。

復次於無餘涅槃界。聲聞獨覺一切聖道由頓捨所捨非諸菩薩。是故唯說諸菩薩為無盡善根者無盡功德者。頓捨所捨者是究竟不現行捨義。非諸菩薩所得聖道。有如是捨為欲利益一切有情。皆得涅槃故。由此因緣。無盡慧經等說諸菩薩為無盡善根者無盡功德者。復次何故建立諸無記事。由彼所問不如理故。何故所問不如理耶。遠離因果染淨所應思處故。此中顯示如來於諸外道所問世間常無常等

事中建立十四不可記事。由彼所問不如正理。能引無義利故。何等問論能引義利。謂依四聖諦所有問論。由此問論因果染淨應思處所攝故。復次何緣菩薩已入菩薩超昇離生位而非預流耶。由得不佳道一向預流行不成就故。何緣亦非一來耶。故受諸有無量生故。何緣亦非不還耶。安住靜慮還生欲界故。又諸菩薩已得諦現觀於十地修道位。唯修所知障對治道。非煩惱障對治道。若得菩提時頓斷煩惱障及所知障。頓成阿羅漢及如來。此諸菩薩雖未永斷煩惱。然此煩惱猶如呪藥所伏諸毒。不起一切煩惱。

過失一切地中如阿羅漢已斷煩惱復次諸菩薩於所知境應修善巧於諸方便應修善巧於虛妄分別應修善巧於無分別應修善巧於時時中應修練根所知境者略有六種一迷亂二迷亂所依三不迷亂所依四迷亂不迷亂五不迷亂六不迷亂等流迷亂者謂能取所取執迷亂所依者謂聖智所行唯有行相虛妄分別為體由有此故一切愚夫迷亂執轉不迷亂所依者謂真如無分別智所依處故迷亂不迷亂者謂隨順出世智所有聞慧等諸善法分別所知境故隨順無分別智故不迷亂者謂無分別智不

迷亂等流者謂聖道後所得善法方便善巧者略有四種一成熟有情善巧二圓滿佛法善巧三速證通慧善巧四道無斷善巧成熟有情善巧者謂四攝事由攝受彼令處善法故圓滿佛法善巧者謂慧波羅蜜多如經言若菩薩摩訶薩欲得圓滿施波羅蜜多乃至一切種妙智性當學般若波羅蜜多故速證通慧善巧者謂日夜六時發露諸惡隨喜功德勸請諸佛迴向善根等廣說如聖者彌勒所問經道無斷善巧者謂無住處涅槃由此數數究竟無斷周徧十方一切世界隨所應化示現一切佛菩薩行。

五善巧中初標五後別釋方便善巧應如瑜伽十

二種善巧釋。

虛妄分別者略有十種謂根本分別相分別相顯現  
分別相變異分別相顯現變異分別他引分別不如  
理分別如理分別執著分別散亂分別根本分別者  
謂阿賴耶識是一切分別種子故相分別者謂身所  
居處所受用識是所取相故彼復如其次第以諸色  
根器世界色等境界為相相顯現分別者謂六識身  
及意如前所說所取相而顯現故相變異分別者謂  
如前所說身等相變異生起相顯現變異分別者謂

如前所說眼識等相顯現於苦樂等位差別生起他  
引分別者謂教法所攝名句文身相此復二種一惡  
說法律為體二善說法律為體由此增上力如其次  
第引二作意所攝謂不如理分別如理分別執著分  
別者謂不如理分別所起六十二見所攝所有分別  
散亂分別者謂如理分別所起無性等執為相所有  
分別。

第十散亂分別有二初總後別內道所起名如理  
所引。

此復十種謂無性分別有性分別增益分別損減分

別一性分別異性分別自性分別差別分別隨名義  
分別隨義名分別如是十種分別依般若波羅蜜多  
初分宣說。如經言舍利子是菩薩實有菩薩正不隨  
觀菩薩正不隨觀菩薩名正不隨觀般若波羅蜜多  
正不隨觀菩提正不隨觀行正不隨觀不行所以者  
何名自性空非空性色自性空非空性乃至識自性  
空非空非空性何以故此色空性非即色亦不離色  
別有空性色即是空性空性即是色乃至識亦爾何  
以故此唯有名所謂此是菩薩名此是菩薩此是般  
若波羅蜜多此是菩提此是色乃至此是識由彼自

性無生無滅無染無淨菩薩行般若波羅蜜多時正  
不隨觀生乃至正不隨觀淨何以故於所計度彼彼  
諸法假立客名由隨客名而起言說隨如是如是言  
說起如是如是執著菩薩於如是一切名正不隨觀  
正不隨觀故不生執著於此經中爲對治無性分別  
故說如是言是菩薩實有菩薩如是等由實有言是  
有性義故爲對治有性分別故說如是言正不隨觀  
菩薩乃至正不隨觀不行由遺補特伽羅及法二性  
故爲對治增益分別故說如是言所以者何名自性  
空由遣不實偏計所執自性故爲對治損減分別故

說如是言非空性由於此名徧計所執自性遠離性  
 一切時有故。為對治一性分別故說如是言此色空  
 性非即色乃至此識空性非即識由自性異故。所以  
 者何色等是徧計所執自性空性是圓成實自性故  
 為對治異性分別故說如是言亦不離色別有空性  
 乃至空性即是識由徧計所執自性無相故離彼彼  
 無性不可得故。為對治自性分別故說如是言此唯  
 有名所謂此是色乃至此是識等。由離能詮無有決  
 定所詮自性故。為對治差別分別故說如是言由彼  
 自性無生乃至正不隨觀淨由遣生等差別相故為

對治隨名義分別故說如是言於所計度彼彼諸法  
 假立客名由隨客名而起言說如是等。為對治隨義  
 名分別故說如是言菩薩於如是一切名正不隨觀  
 正不隨觀故不生執著由隨義於名不見不執故

別中有三初標列十分別次引經屬

無分別者略有三種一知足無分別二無顛倒無分  
 別三無戲論無分別如此三種異生聲聞菩薩如次  
 第應知。

後釋無分別中有二初標列次別釋

由諸異生隨於一無常等法性究竟思已便生喜足

謂是事必然更無異望是名知足無分別。爾時一切  
 尋思分別皆止息故。由諸聲聞於諸蘊中為對治常  
 等顛倒故如理觀察唯有色等法時。便得出世閒智  
 通達無我性。是名無顛倒無分別。由諸菩薩知色等  
 法唯戲論已遂能除泯一切法相得最極寂靜出世  
 閒智通達徧滿真如是名無戲論無分別。

釋第三無戲論無分別。中有二。初總解後離五相。  
 此無分別智復離五相。謂非無作意故。非超過故。非  
 寂止故。非自性故。非於所緣作加行故。故名無分別。所  
 以者何。若無作意故名無分別。熟眠醉等應是無分

別智。由彼不思惟諸法相故。若超過故名無分別。從  
 第二靜慮已上一切地應是無分別智。由彼超過尋  
 伺故。若爾三界心心法是分別體。言即為相違。若寂  
 止故名無分別。滅受想定應是無分別智。分別心心  
 法於彼寂止故。若爾智亦應無。若自性故名無分別。  
 色等應是無分別智。彼非分別自性故。若於所緣作  
 加行故名無分別。即分別性應是無分別智。若謂此  
 是無分別。此加行相即分別相故。是故無分別智非  
 彼五相。

離五相有二。初標解離五相後釋無戲論無分別



相。初文有三。初標。次別釋。後結成。

若爾當云何觀無戲論無分別相。謂於所緣不起加行。此復云何。若諸菩薩遇隨順教。觀察諸法。若性若相。皆不真實。由此觀察。串習力所持。故不由加行於如實無戲論界一切法。真如中內心寂定。如是乃名無戲論無分別智。復次若諸菩薩性是利根。云何復令修練根耶。謂令依利。輒根引發利中根。復依利中根。引發利根。故前已說一切菩薩性是利根。而復說於時時中應修練根者。由於自種類。復有輒等三品。後後相引發。故說名練根。若異此者。諸利根種姓

補特伽羅應根唯一品。諸菩薩等根品差別應不可得。然有可得。是故利根復有差別。

後解無戲論無分別中有四。一問。二答。三難。四通。  
大乘阿毗達磨雜集論述記卷第二十八

